


**IKINYARWANDA: Ubumenyi
bw'Ururimi n'Iyigayigisha**

KIN 02

22/07/2021

8.30 AM - 11.30 AM



**IKIZAMINI CYA LETA GISOZA IKICIRO CYA KABIRI
CY'AMASHURI YISUMBUYE 2020-2021**

IKIZAMINI: IKINYARWANDA

ISOMO: IKINYARWANDA: UBUMENYI BW'URURIMI N'IYIGAYIGISHA

ISHAMI: INDERABAREZI (TTC)

AGASHAMI : INDIMI N'UBUREZI (LE)

IGIHE KIMARA : AMASAHA ATATU (3)

AMABWIRIZA

1. Andika amazina yawe na numero yawe ku ikayi y'ibisubizo nk'uko byanditswe kuri "Registration form" ariko ubujijwe kubyandika ku mpapuro z'inyongera uhabwa bibaye ngombwa.
2. Ntufungure iyi kayi y'ibibazo by'ikizamini utabiherewe uburenganzira.
3. Ikizamini kigizwe n'ibibazo cumi n'ikenda (19) n'ibice bitanu by'ingenzi:

Igice cya mbere: Kumva no gusesengura umwandiko **(amanota 24)**

Igice cya kabiri: Ikibonezamvugo **(amanota 18)**

Igice cya gatatu: Ubumenyi rusange bw'ururimi **(amanota 23)**

Igice cya kane : Ihangamwandiko **(amanota 15)**

Igice cya gatanu : Iyigayigisha **(amanota 20)**

4. Ubahiriza itonde ry'ibibazo uko bikurikirana.
5. Subiza muri make utarondogoye.
6. Amazina yawe cyangwa ay'ishuri wigamo ntagire aho agaragara handi hatari ahabugenewe ku ikayi y'ibisubizo.
7. Gusiribanga, guhindagura no guhuza ibisubizo na mugenzi wawe cyanecyane ibipfuye bifatwa nko gukopera cyangwa gukopezwa.

RUBYIRUKO TWIRINDE

Umugabo Rutabikangwa yabyirutse avuga ko azabyara akuzuza isi. Ugira ngo se Rutabikangwa yari muntu ki ko atagiraga n'urwara rwo kwishima! Yari umutindi urya aciye inshuro, yayibura agasonza. Yabaye imbata y'akabari kuva akigimbuka, ijisho rye ntiritane no kwifuza abagore n'abakobwa b'imuhana. Yabyariraga abakobwa, abagore bubatse ingo, ibintu bigacika ku buryo rubanda rwari rwaramugize urw'amenyo. Aho ashakiye imvugo ayigira ingiro, arabyara karahava. Abana be barakura baragimbuka, bakoma inkanda ya se; ngo nta nyana yima nyina akabara! Imvugo ya se ibamera ku munwa, uvutse wese akaba azi ko mu mishinga ibaho uwa mbere ari ukororoka akuzuza isi.

Umukobwa we Nagahire ariko yumvaga ko imvugo ya se n'abavandimwe be idakwiye kuko isi dutuye itabitwemerera; amasambu yabaye ntayo, ubutaka bwaragundutse; mbese muri make nta bushobozi buhagije ababyeyi bafite bwo gutunga abo babyaye ku buryo buhagije. Ababyeyi be, bene nyina, basaza be ndetse n'abaturanyi yahoraga iteka abashishikariza kumenya ubuzima bw'imyororokere, kuringaniza urubyaro no kubyara abo bashoboye kurera nyamara ugasanga aracurangira abahetsi.

Nagahire yari afite ubumenyi ku buzima bw'imyororokere, akamenya kwitwararika. Yari yifitemo kandi impano yo gukangurira abantu b'ingeri zose abana, ingimbi, abangavu, abasore n'inkumi, abagore b'amajigira, abagabo b'ibikwerere, abasaza n'abakecuru, uko bagomba kwitwara ngo birinde indwara zandurira mu myanya ndangagitsina nka Sida, imitezi, mburugu, uburagaza n'izindi.

Abavandimwe ba Nagahire ntibumviraga inama ze na mba. Bavugaga ko Sida ari indwara nk'izindi. Ibyo byatumye bamwe muri bo bayandura, irabakenesha, irabahemuza, ibatesha agaciro, bafumbira umunaba bakiri bato. Abari basigaye na bo utaretse na se Rutabikangwa, bari ba nyakwigendera. Ntibari bakibona n'imirondorondo y'ibijumba ngo babeshye mu nda. Abari baraboroje inka na bo bari barazishubije kubera ko batari bafite

imbaraga zo kuzahirira ubwatsi. Nagahire yarebaga ibyo byose bikamushavuzi. Yigaga bimugoye ariko agashyiraho umwete. Yaharaniraga kunguka ubumenyi buhagije mu bijyanye n'ubuzima bw'imyororokere no kuzahugura abantu benshi bashoboka haba mu gihugu ke ndetse no hanze yacyo.

Inzozo ze yarazikabije kuko bidatinze yabonye impamyabumenyi mu bijyanye n'ubuzima bw'imyororokere. Nyuma y'igihe gito yatangiye kujya atanga ibiganiro mu mahugurwa yo ku byerekeye ubuzima. Ikiganiro cya mbere yagitanze mu mahugurwa y'urubyiruko rwiga mu mashuri yisumbuye. Dore ibyo yabaganirije: "Tubanze twimenye, tumenye ibice bigize umubiri wacu n'imikorere yabyo, uko umubiri ushobora kwivumbura mu kigero runaka umuhungu akaniga ijwi, akaba yatangira kwirotaraho ari cyo kimenyetso kigaragaza ko yatera inda imburagihe, akaba yamera ubwanwa, impwempwe, inshakwaha, agasesa ibishishi, n'ibindi. Imihindagurikire y'umubiri w'umukobwa na yo igaragazwa no kumera amabere, kubyibuha amatako n'ikibuno, kugira ibishishi mu maso, kujya mu mihango ari na cyo kimenyetso kigaragaza ko ashobora gusama igihe akoze imibonano mpuzabitsina idakingiye. Mu gihe rero abakobwa n'abahungu babonye ibimenyetso nk'ibi by'imihindagurikire y'ubuzima bwabo, bagomba kumenya ko ari ibimenyetso by'ubukure, bakirinda ibyateza ingaruka ku buzima bwabo. Uzi gutangira kuzuza inshingano z'abakuru uri umwana! Uzi guhaha, gutanga indezo ku mwana wabyaye kandi nta rwara rwo kwishima wigurira? Iyo noneho wishoye mu mibonano mpuzabitsina nta gakingirizo, dore ngo Sida iragukacanga. Iyi ndwara ntikangwa ngo uri iki, ngo usengera aha, ngo wize ibi, ngo ukora aha; abantu batitwararika ngo bamenye kwirinda, irabakukumba ikababika iyo ngiyo, igihe cyagera bakazima."

Mu gusoza, Nagahire yaragize ati: "Mucyo rubyiruko twirinde kwiandarika turangwe no kwifata. Kurya utw'ubusa, kwifuza ibyo tudafitiye ubushobozi, kurarikira iby'abandi tukonona imibiri yacu tubizinukwe. Bana b'i Rwanda twitegure kuba inkumburwa n'inyamibwa, tugendere ku ndangagaciro z'umuco nyarwanda."

IGICE CYA MBERE: KUMVA NO GUSESENGURA UMWANDIKO (amanota 24)

1) "Abana be barakura baragimbuka, bakoma inkanda ya se." Sobanura ugendeye ku bivugwa mu mwandiko. **(amanota 2)**

2) Andika ibintu bitatu (3) bigaragaza ko abavandimwe ba Nagahire batigeze bakurikiza inama yabagiraga. **(amanota 3)**

3) Garagaza ibimenyetso biranga ubwangavu n'ubugimbi (ibimenyetso bitatu kuri buri kiciro). **(amanota 6)**

4) Uretse kwandurira mu mibonano mpuzabitsinda ni hehe handi uzi indwara ya Sida ishobora kwandurira? **(amanota 2)**

5) Sobanura amagambo cyangwa itsinda ry'amagambo akurikira ukurikije uko yakoreshejwe mu mwandiko: **(amanota 4)**

- (a) Gucurangira abahetsi
- (b) Indezo
- (c) Imirondorondo y'ibijumba
- (d) Gukabya inzozi

6) Koresha amagambo akurikira mu nteruro wihangiye yumvikanisha inyito afite mu mwandiko (Wirinde kwandukura interuro ziri mu mwandiko): **(amanota 4)**

- (a) kugimbuka
- (b) imbata
- (c) guca inshuro
- (d) kugunduka

7) Simbuza ijambo cyangwa itsinda ry'amagambo atsindagiye yakoreshejwe mu mwandiko impuzanyito zayo. (amanota 3)

(a) Abantu **bafumbiye umunaba** bazize Sida ni benshi.

(b) Uzi kurera umwana **nta rwara rwo kwishima** wigirira ?

(c) Kamana ntakibona umusaruro uhagiye kubera ko ubutaka bwe **bwagundutse**.

IGICE CYA KABIRI: IKIBONEZAMVUGO (amanota 18)

8) Hanga interuro ngufi zirimo ibi bikurikira :

(amanota 5)

(a) Ikinyazina ngenga

(b) Ntera

(c) Izina ntera

(d) Imbundo

(e) Ikinyazina mbanziriza

9) Garagaza intego y'amagambo atsindagiye n'amategako y'igenamajwi yubahirijwe mu mpine (amanota 8)

(a) Ifu **yavugwagamo** umutsima yabaga **yasewe** ku rusyo rwa kinyarwanda.

(b) Ababyeyi bavuze impundu mu gihe **abakwe** bahabwaga ibyicar.

10) Tondagura inshinga ziri mu dukubo mu buryo bwashabwemo : (amanota 5)

(a) (kuvuga: ikigombero, ngenga ya 2 y'ubumwe) ibyo wakoze bitazagukoraho.

(b) (kubyara: inyifurizo, ngenga ya 2 y'ubwinshi) muhinguye.

(c) (kubyuka, koga, kwambara: inkurikizo, ngenga ya 3 y'ubumwe) akabona kujya mu yindi mirimo.

IGICE CYA GATATU: UBUMENYI RUSANGE BW'URURIMI (amanota 23)

11) Andika ibintu bitatu bitandukanya inkuru ndende n'inkuru ngufi.

(amanota 6)

12) Simbuza amagambo ari mu dukubo andi yabugenewe:

(amanota 5)

(a) Kamana (arangije gukama), abana batangiye kunywa (amata amaze gukama ako kanya).

(b) Kamanayo avuye (kugura ingoma) ahita (ayimanika) ku rusika.

(c) Umwami yagiye (mu bwihereho) abarinzi basigara hafi aho.

13) Ubutinde n'amasaku: Shyira amagambo akurikira mu matsinda ukurikije ubutinde n'amasaku:

(amanota 6)

- umugayo

- uruhare

- umukoro

- urwego

- umutavu

- urugendo

- umugano

- ubugingo

- igikenya

- umuhondo

- ubwato

- icyaha

14) Kosora izi nteruro aho zanditse nabi:

(amanota 6)

(a) Kaby'inzosi na banki ya we.

(b) Nyir'ubwenge aruta nyir'uburyo.

(c) Icyatumye ntaza ejo bundi nuko natashye ndwaye.

IGICE CYA KANE : IHANGAMWANDIKO (amanota 15)

15) Kora inyandiko mvugo y'imigendekere y'ikizamini k'Ikinyarwanda mu cyumba wakoreyemo. Uyikore mu mazina ya Kamari Mugabo wo mu Ishuri Nderabarezi rya Karutare. Iyo nyandiko mvugo ntige munsu y'imirongo mirongo itatu n'itanu (35).

IGICE CYA GATANU : IYIGAYIGISHA (amanota 20)

- 16) Imfashanyigisho itandukaniye he n'integanyanyigisho? **(amanota 2)**
- 17) Tanga imimaro ine y'integanyanyigisho **(amanota 4)**
- 18) Erekanaga ingingo enye (4) mu ngingo nsanganyamasomo zibanzweho mu gutegura integanyanyigisho ishingiyeye ku bushobozi. **(amanota 8)**
- 19) Tanga amoko y'imfashanyigisho zikoreshwa mu kwigisha ururimi rw'Ikinyarwanda unazisobanure **(amanota 6)**

-IHEREZO-

URUPAPURO RUTARIHO IBIBAZO